

ZAKON O PLAĆAMA I DRUGIM NAKNADAMA SUDIJA I TUŽILACA U BRČKO DISTRIKTU BiH

Službeni glasnik Brčko Distrikta BiH, broj 1/06.

I. OPĆE ODREDBE

Član 1 Okvir Zakona

Ovim zakonom regulišu se plaće, naknade i određena materijalna prava sudija i tužilaca u Brčko distriktu.

II. PLAĆE, DRUGA PRAVA I NAKNADE

Član 2 Osnovne mjesečne plaće sudija

Osnovne mjesečne plaće sudija iznose:

- za sudije Osnovnog suda u Brčkom: 2.980 KM;
- za predsjednika Osnovnog suda u Brčkom: 3.200 KM;
- za sudije Apelacionog suda u Brčkom: 3.200 KM;
- za predsjednika Apelacionog suda u Brčkom: 3.500 KM.

Član 3 Osnovne mjesečne plaće tužilaca

Osnovne mjesečne plaće tužilaca iznose:

- za tužioce Tužilaštva Brčko distrikta: 2.980 KM;
- za zamjenike glavnog tužioca Tužilaštva Brčko distrikta: 3.100 KM;
- za glavne tužioce Tužilaštva Brčko distrikta: 3.400 KM.

Član 4 Dodatak na radni staž

Osnovna mjesečna plaća svakog sudije i tužioca iz čl. 2 odnosno 3 ovog zakona povećava se za 0,5% za svaku punu godinu radnog staža, najviše do 40 godina.

Član 5 Regulisanje osnovne mjesečne plaće

1. Plaće propisane članovima 2 i 3 ovog zakona neće se povećavati sve dok prosječna mjesečna neto plaća u Bosni i Hercegovini izračunata za kalendarsku godinu ne dostigne ili ne pređe iznos od 800 KM.

2. Počevši od godine koja uslijedi nakon godine u kojoj prosječna mjesečna neto plaća u Bosni i Hercegovini izračunata za kalendarsku godinu po prvi put dostigne ili pređe iznos od 800

KM, osnovne mjesečne plaće sudija i tužilaca propisane članom 2 odnosno 3 će se godišnje korigovati za procent povećanja prosječne mjesečne neto plaće u Bosni i Hercegovini.

3. Procenat povećanja iz stava 2 ovog člana izračunat će se tako što će se uporediti prosječna mjesečna neto plaća u Bosni i Hercegovini za kalendarsku godinu s prosječnom mjesečnom neto plaćom u Bosni i Hercegovini iz prethodne kalendarske godine.

4. U slučaju da se u nekoj godini prosječna mjesečna neto plaća u Bosni i Hercegovini izračunata za kalendarsku godinu smanji, osnovne mjesečne plaće sudija i tužilaca ostaju iste i neće se ponovo povećavati sve dok prosječna mjesečna neto plaća u Bosni i Hercegovini izračunata za kalendarsku godinu ne dostigne najviši nivo od prvog povećanja plaća u skladu sa stavom 2 ovog člana. Nakon toga, plaće sudija i tužilaca se povećavaju u skladu sa stavom 2 ovog člana.

5. Prosječna mjesečna neto plaća za kalendarsku godinu bit će ona plaća koju objavi Agencija za statistiku Bosne i Hercegovine.

Član 6 **Radno vrijeme**

1. Broj radnih sati za sudije i tužioce je 40 sati sedmično.

2. Ukoliko sudija odnosno tužilac radi pola radnog vremena, u skladu s posebnim zakonom ili propisima, osnovna mjesečna plaća iz člana 2 odnosno 3 ovog zakona, korigovat će se u skladu s brojem odrađenih dana u odnosu prema broju redovnih radnih dana za taj mjesec.

Član 7 **Plaćeni godišnji odmor i odsustvo za vjerske praznike**

1. Sudije i tužioci imaju pravo na plaćeni godišnji odmor u trajanju od 30 radnih dana.

2. Pored prava na godišnji odmor definisanog u stavu 1 ovog člana, sudije i tužioci imaju pravo na dva plaćena i dva neplaćena dana odsustva godišnje za zadovoljenje vjerskih obaveza.

3. Sudije i tužioci imaju pravo na neto naknadu za godišnji odmor u iznosu od 50% osnovne mjesečne plaće iz člana 2a odnosno 3a.

4. Neto naknade za godišnji odmor iz stava 3 ovog člana plaća se kao dodatak na redovnu plaću u julu svake godine, bez obzira na to kada se uzima godišnji odmor.

5. Plaćeni godišnji odmor za svakog sudiju i tužioca bit će regulisan planom godišnjih odmora koji će odrediti predsjednik suda ili glavni tužilac na godišnjoj bazi u skladu s propisima o unutrašnjem poslovanju predmetnog suda odnosno tužilaštva.

Član 8 **Vanredno plaćeno odsustvo**

Pored godišnjeg odmora i odsustva za vjerske praznike regulisanog članom 7 ovog zakona, sudije i tužioci imaju pravo na sedam plaćenih dana odmora u kalendarskoj godini kako slijedi:

1. U slučaju ženidbe/udaje: 5 dana;
2. U slučaju smrti bliskog srodnika (supružnika, partnera, majke, oca, očuha, maćehe, djeteta, pastorka/pastorke, brata, sestre, polubrata, polusestre): 3 dana;
3. U slučaju smrti manje bliskog srodnika (djeda, bake ili bliskog srodnika bračnog druga ili partnera): 1 dan;
4. U slučaju rođenja djeteta: 2 dana;
5. U slučaju selidbe iz stalnog prebivališta u drugo prebivalište: 1 dan.

Član 9

Plaćeno odsustvo

1. Visoko sudsko i tužilačko vijeće može odlučiti da sudija odnosno tužilac nastavi primati svoju plaću tokom odsustva koje mu odobri Visoko sudsko i tužilačko vijeće u skladu s članom 17 tačkom 13 Zakona o Visokom sudskom i tužilačkom vijeću Bosne i Hercegovine («Službeni glasnik Bosne i Hercegovine», broj 25/04).

2. Visoko sudsko i tužilačko vijeće u saradnji s Pravosudnom komisijom Brčko distrikta, izdaje propise u vezi sa okolnostima pod kojim sudija odnosno tužilac nastavlja primati plaću tokom odsustva definisanog u stavu 1 ovog člana.

Član 10

Naknada prilikom odlaska u penziju

Sudije i tužioci imaju pravo na jednu osnovnu mjesečnu plaću kao naknadu prilikom odlaska u penziju, kao što je to propisano u članu 2 odnosno 3 ovog zakona.

Član 11

Zdravstveno osiguranje i bolovanje

Sudije i tužioci imaju pravo na zdravstveno osiguranje i bolovanje u skladu s važećim Zakonom o zdravstvenom osiguranju u Brčko distriktu BiH.

Član 12

Penzijsko i invalidsko osiguranje

Sudije i tužioci imaju pravo na penzijsko i invalidsko osiguranje u skladu s važećim Zakonom o penzijskom i invalidskom osiguranju u Republici Srpskoj ili u Federaciji Bosne i Hercegovine, zavisno od fonda u koji su uplaćivali doprinose.

Član 13

Naknade za putne troškove

Sudije i tužioci imaju pravo na naknadu za troškove nastale u toku službenog putovanja (dnevnice, prijevoz i smještaj) u skladu s važećim Pravilnikom za zaposlenike u pravosuđu Brčko distrikta, i odobrenim budžetom suda ili Tužilaštva.

Član 14
Naknade za troškove edukacije

Sudije i tužioci imaju pravo na naknadu za troškove nastale u toku edukacije u skladu s propisima o unutrašnjem poslovanju suda ili Tužilaštva i odobrenim budžetom suda ili Tužilaštva.

Član 15
Naknada za upućivanje u drugi sud sa ili bez pristanka sudije

U slučaju upućivanja sudije da vrši dužnost sudije u drugom sudu u skladu s članom 50 ili 51 Zakona o visokom sudskom i tužilačkom vijeću, taj sudija ima pravo na naknadu za troškove u skladu sa odredbama koje donose Visoko sudsko i tužilačko vijeće u saradnji s Pravosudnom komisijom Brčko distrikta.

III. ZAVRŠNE ODREDBE

Član 16
Stavljanje odredbi van snage

Odredbe sadržane u drugim zakonima, propisima ili odlukama Brčko distrikta koje su u suprotnosti s odredbama ovog zakona, prestaju da važe danom stupanja na snagu ovog zakona.

Član 17
Objavljivanje i stupanje na snagu

Ovaj zakon stupa na snagu 01. januara 2006. godine i objavit će se u "Službenom glasniku Brčko distrikta BiH".